

Naqqiut

(Allaaserisap siornanit ilapittorneqarnera)

Uunga siunnersuut: Inatsisartut Naalakkersuisullu pillugit Inatsisartut inatsisaata allanngortinneqarnera pillugu Inatsisartut inatsisaat (Inatsisartut elektroniskimik ataatsimiittarnissaannut periarfissaq)

(Naalakkersuisut Siulittaasuat)

Saqqummiussissut

(Naalakkersuisut Siulittaasuat)

Siullermeerneqarnera

Siunnersuut manna, Inatsisartut Siulittaasoqarfiat oqaloqatigereerlugu paaseqatigereerlugu saqqummiunneqartoq, 2022-mi ukiaanerani ataatsimiinnermi immikkut ittumik ilanngummagu, Naalakkersuisut Inatsisartut Siulittaasoqarfiat qutsavigaat. Assersuutigalugu 2020-mi martsimi coronap ajornartorsiortitsinerata nalaani pisutut inuiaqatigiinni nukinginnartunik ajornartoornernillu pisoqassagaluarpat, Inatsisartut aalajangiisinnaassuseqartuaannarnissaat, siunnersuummi qulakkeerneqassaaq.

Nunatsinni nunarsuarmilu pissutsit ilaatigut sukkasuumik ineriartorsinnaanerata pilertorerusumik sulisinnaanissaq pisariaqartilersimavaa.

Kalaallit Nunaata isorartunerata angallannikkullu unamminarsinnaaera pissutigalugit Inatsisartut tamarmiusut nukinginnartumik ataatsimiigiaqquneqarsinnaanerata ajornakusoorpoq. Immikkut annertuumik pisoqartillugu t inatsisitigut suliniuteqarnissamik pisariaqartitsiviusunut atatillugu pisariaqalersillugu pinartumik suliaqariataarneq ajornakusooruujussuusinnaasarpoq.

Taamaattumik suliassanut kinguartinneqarsinnaanngitsunut Inatsisartut Siulittaasoqarfiat naliliippat Inatsisartut elektroniskimik ataatsimiissinnaanissaat Inatsisartut Siulittaasoqarfiat suleqatigalugu siunnersuummi matumani ammaanneqarpoq.

Taamatut oqaaseqarlunga siunnersuut Inatsisartuni kajumittumik suliassanngortippara.